

समां - 12:25 hrs.

<><><><><><>

PRAHAR Counter Terrorism Policy

भारत सरकार नै “प्रहार” नां कन्नै मुख्यै दी पैहली आतंकवाद रोधी नीति जारी कीती ऐ जेहड़ी आतंकवाद गी दना बर्दाश्त नैई करने दे भारत दे नजरिए पर आधारित ऐ। केन्द्री गृह मंत्रालय आसेया जारी इस नीति च मुख तौरा पर ध्यान खूफिया जानकारी राएं आतंकवाद दी रोकथाम, आतंकी ढांचे गी नष्ट करना, आतंकवाद लेई थेहार, रपेया-पैहा ते सुरक्षित आसरमें उपलब्ध कराने आहलें पर रोक लाना शामिल ऐ। “प्रहार” नीति तैहत आतंकवाद रोधी कम्में च औने आहलियें रुकावटें ते चुनौतियें गी खतम करना बी शामिल ऐ। इस पालसी च बन्ने पारा आतंकवाद, साइबर हमलें ते अपराधिक ट्रैकरें करी पैदा होई सकने आहले खतरें दा बी जिक्र ऐ। गृह मंत्रालय दा आखना ऐ जे बदलदे दौर दे कन्नो-कन्नी आतंकवाद फैलाने ते अपराध करने दे तौर-तरीकें बी बदला करदे न, इस करियें इस नीति गी इस चाल्ली कन्नै तयार कीता गया ऐ कि आतंकवाद दे कुसै बी चाल्ली दे खतरे कन्नै निबड़ेया ते इसी खतम कीता जाई सकै।

<><><><><><>

DDC Term End

जम्मू-कश्मीर सरकार नै जिला विकास काउंसल दे मिम्बरें दे 5 बरे दे कार्यकाल दे समापन दी गल्ल आखी ऐ। जिला विकास काउंसल, मुकामी प्रशासन दी सब्भनं थमां हेठली सतह

पर औने आला प्रशासन ऐ। जम्मू-कश्मीर च जिला विकास काउंसल दे चुनां 2020 च करोआए गे हे। ए चुनां 20एं जिलें च होए हे। मंत्री जावेद अहमद होरें आखेआ जे DDC गी दिते गेदे इख्तेयारें दे कम्म गी अधिकारियें गी देने दा कोई प्रावधान नैई ऐ । DDC दा कार्यकाल मुक्कने कन्नै त्रंऊ स्तहें आहला पंचायती राज सरिस्ता समापत होई जाग। पैहले गे 2 स्तहें पंचायतें ते ब्लाक विकास परिषदें दा कार्यकाल मुक्की चुके दा ऐ।

<><><><><><>

Rajouri Budget Quest

जम्मू-कश्मीर दे सरहदी जिले राजौरी नै 3 फरवरी कोला लेइयै 22 फरवरी 2026 तगर “माई भारत पोर्टल पर आयोजित बजट क्वेस्ट-2026 प्रश्नोत्तरी” च भारी गिनतरी च शमूलियत कन्नै मुल्खै च पैहली थाहर हासल कीती ऐ। आकाशवाणी दे जम्मू संवाददाता नै जानकारी दिती ऐ जे राष्ट्रव्यापी इस ऑनलाईन प्रतियोगिता च राजौरी जिलें थमां 14 जहार 402 नौजवानें हिस्सा लैता, जिसलै जे नमीं दिल्ली जिला दुए नम्बरै पर रेहा, जित्थुआ इस प्रतियोगिता च हिस्सा लैने आहलें नौजवानें दी गिनतरी 11 जहार 97 दर्ज कीती गेई। इससै चाल्ली कुल 8 जहार 307 नौजवानें दी शमूलियत कन्नै पूर्वी दिल्ली जिला 3एं नम्बरै पर रेहा। माई भारत बजट क्वेस्ट-2026 प्रश्नोत्तरी दा मकसद आम लोकें च केन्द्री बजट दे बारे च जागरूकता ते एहदी समझ पैदा करना हा। इस पैहले गेड़ च पास होने आहले प्रतिभागी हून अगले गेड़ च जागंन, जेहड़ा जे इक एस्सै यानि निबंध लेखन आहला राउंड होग ते उन्दे चा बी अग्गे ताले जाने आहलें गी प्रधानमंत्री नरेन्द्र मोदी हुंदे कन्नै मिलने ते गल्लबात करने दा इक मौका थहोग।

<><><><><><><><>

Ranji Trophy

पैहली बारी रणजी ट्रॉफी दी फाईनल खेड्ने जा'रदी जम्मू-कश्मीर दी क्रिकेट टीम दा मुकाबला इस प्रतियोगिता गी अट्ठ बारी अपने नां करी चुकी दी कर्नाटक दी टीम कन्नै अज्ज कर्नाटक दे हुबली च शुरु होग। अपने पुराने दिग्गज खडारियें के.एल राहुल, करुण नायर, श्रेयस गोपाल ते मयंक अग्रवाल थमां प्रेरित कर्नाटक दी टीम अपनी अनुभवी बल्लेबाजी ते इस सत्र च अपने रोमांचक सफर पर निर्भर करा करदी पर फाईनल च पैहली बारी पुज्जने आहली जम्मू-कश्मीर दी टीम गी इन्नै बड्डे मौके पर तजुबे दी कमी ते होई सकदी ऐ, पर हुन तगर दस्से गेदे अपने हौसले, दृढ़ निश्चय ते जोश-जज्बे दे कन्नो-कन्नी तगड़ी फार्म च चला रदे तेज गेंदबाज आकिब नबी ते किश होर भरोसेमंद खडारियें दे योगदान कन्नै एह टीम इतिहास रचने दे कोल खड़ोती दी ऐ। जम्मू-कश्मीर नै पैहले टॉस जितियै बल्लेबाजी करने दा फैसला कीता। खीरी खबरां थहोने तगर जम्मू-कश्मीर दी टीम दा स्कोर 104 पर हा।

<><><><><><><><>

KIWG Ist Day Results

कल गुलमर्ग च शुरु होए दे 6में खेलो इंडिया स्यालू खेड्डें दे दुए गेड़ च खडारियें ते लोके च बड़ा मता उत्साह दिक्खने गी लब्बै करदा ऐ। पैहले ध्याड़े कल मर्दे दे स्नोबोर्ड स्लैलम च जम्मू-कश्मीर दे वकार अहमद लोन नै कैह दा, फौज थमां कुलविंदर शर्मा ते विवेक

राणा नै बिलतरतीब चांदी ते सुन्ने दा तगमा जितेया। महिलायें दी 15 किलोमीटर नार्डिक स्कींग च सी.आर.पी.एफ दी काजल कुमारी ते रेणु दानू नै बिलतरतीब सुन्ने ते चांदा दा तगमा ते कर्नाटक थमां भवानी टी.एन. नै कैह दा तगमा हासल कीता ऐ। इस्सै चाल्ली हिमाचल प्रदेश दी सिंदिया ठाकुर ते आंचल ठाकुर नै महिलायें दे एल्पाइन जायंट स्लालम पर अपना दबदबा रखेया- जिसलै कि मर्दे च फौज दे एथलीटें एहदे च बाजी मारी।

<><><><><><>

Wild Life Udhampur

जिला कनूनी सेवा प्राधिकरण उधमपुर आसेया जम्मू-कश्मीर वन्यजीव सुरक्षा विभाग दे सहयोग कन्नै मिलियै इक दिनै दा जागरुकता कार्यक्रम दा सरिस्ता कीता गया। टांडै रख पार्क च लोआए गेदे इस कार्यक्रम दा मकसद माहनू ते जंगली जिएं बशकार होने आहली झड़प्फें कोला बचाह, प्रबंधन ते राहत कारवाई बारे लोकें गी जागरुक करना हा। तां जे इस चाल्ली दी स्थिति कोला बचेया जाई सकै। मैहकमे दे अधिकारियें ते वन्य- जीव दे माहिरें लोकें कन्नै गल्लबात कीती ते उनेंगी समझाया जे किस तौरा दी हिदायत बरतियै इस चाल्ली दी स्थिति कोला बचेया जाई सकदा ऐ- जिंदे च एहतियाती बचाऽ अपात प्रतिक्रिया ते जंगली जानवर कन्नै सामना जां झड़प्फ होने दी सूरतै च मामले दी जानकारी तुरत पुजने दे सरिस्ते दी जानकारी शामिल ही।

<><><><><><>